

大明會典

大明會典卷之十二

吏部十一

考功清吏司

郎中員外郎主事掌文職官吏之考課及內外官之考察凡旌別訪譽及諸事故皆得稽之

國家考課之法內外官滿三年為一考六年再考九年通考黜陟即古三載考績三考黜陟幽明遺意京官故皆試職一年考覈實授一考對品調用外官給由到京遇缺借除京職後多不行

以

國初典制畧附見焉

京官

凡京官考覈。洪武二十六年定在京官初入仕者。且令試職一年。後考覈堪用者。與實授。不堪用者。降黜量才錄用。其在任未經考覈。試職官遇有調除。仍於本衙門及別衙門本等職事內用。通理月日。降除及對品改除者。止理見任月日。其候一年照例考覈。或有為事釋免再任除授者。試職照例考覈。○近例惟試御史一年考

覈實授試中書舍人。三年考覈實授。主事署郎中員外郎。六年考覈實授。員外郎署郎中。三年考覈實授。其餘京官一年考覈之例。俱不行。

凡在京堂上正佐官考滿。三年。六年。俱不停俸。在任給由。不考覈。不拘員數。引至

御前奏請復職。○洪武間定。四品以上官員九年任滿黜陟取自

上裁。○永樂元年奏准。太僕寺。光祿寺。通政司。大理寺。國子監。鴻臚寺。翰林院。五品以下堂上官。照太例不考。○五年奏准。詹事府。六品以上官。照太

常寺等官例亦不考。候九年。奏請黜陟。○隆慶元年。議准六部都察院堂上官。通政司大理寺正官。俱隨到隨引。不拘員數。不候類引。其大理寺少卿。寺丞。左右通政。叅議。及小九卿堂上官。仍候類引。另本具奏。○萬曆八年。令大臣考滿。俱面引單奏。遵照舊規行。○十三年。題准兩京堂上官。考察論劾。改調者。以後任之日。為始。另歷給由。不許通理。若自行陳請。得

旨改調者。仍許通理。

凡一品二品官考滿。

賜羊酒鈔錠。尚書都御史六年考滿。加太子少保。九年。加太子太保。吏部尚書有三年。即加太子少保。六年。加太子太保者。

內閣三。六。九年考滿。應陞官秩。取自

上裁。其一品九年考滿。或

賜宴。或

賜勅獎勵。及

誥命。廕子等項。俱出

特恩。或奉

旨查例議擬奏請

凡督撫官考滿三年六年滿日移咨到部具奏復職仍行本官知會○嘉靖三十一年題准宣太。勦遼保定山陝延寧甘肅各邊巡撫係僉都御史三年陞副都即照三品例廕子再考陞侍郎加從二品俸係副都御史三年除本等廕子外陞侍郎加正二品俸級服色再考陞部院正官即與二品應得

誥命其以侍郎及右都御史或尚書總督三年考滿者侍郎陞右都御史右都御史陞尚書尚書量加官保再考各於前官上遞陞一等即給與

應得

誥命。俱要實歷邊俸。及邊俸居三分之二以上者。轉行兵部查無地方失事。或雖曾失事而罪不掩功。方准題請。其有未及考滿。別以軍功蒙恩者。不在此限。有考滿而各項

恩典已得者。不再重加。○四十三年議准。僉都三年。廕子。副都三年。陞正二品服俸。又三年加正二品封贈。俱要兵部查回。果有安攘之功。曾經賞賚者。臨時酌擬。上請定奪。其山西保定陝西三邊較之七邊不同。止與題請陞職以上



恩典雖曾以別項軍功蒙

恩相等者亦准重加。其歷俸月日中間如帶有別俸  
通理者必須邊俸居三分之二以上。方得照例  
題請。○隆慶五年題准。在內部寺為督撫。在外  
督撫回部院某處督撫。陞調某處督撫。俱候到  
任支俸。乃作實歷。其在途在家月日。不許一槩  
朦朧扣算。若已陞調候代。尚在地方理事者。得  
准實歷。離任之後。截日住支。待其給由吏部查  
理明白。方為引奏。○萬曆元年。令以後各官考  
滿例。該陞級者。止許開具應陞緣由。以俟。

朝廷裁予。毋得輒自定擬職任。

凡在京各衙門屬官考滿。洪武二十六年。定六部太常司。光祿司。通政司。大理寺。國子監。太僕寺。欽天監。翰林院。太醫院。儀禮司。屬官。五軍都督府各衛軍職文官。應天府首領官。并所屬上元。江寧二縣官。俱從本衙門正官考覈。○又定六部五品以下官。太常司。光祿司。通政司。大理寺。國子監。太僕寺。欽天監。翰林院。太醫院。儀禮司。屬官。歷任三年。聽於本衙門正官察其行能。驗其勤惰。從公考覈明白。開寫稱職。平常不稱

職詞語送監察御史考覈本部覆考。其在京軍  
職文官俱從監察御史考覈。各以九年通考。○  
弘治元年。令各衙門屬官考滿。堂上官出與考  
語。送都察院并本部覆考。如原來考語得當。續  
出考語不嫌雷同。不當聽覆考。官從公考覈。平  
常者引奏復職。有賊者罷黜為民。其有前考平  
常。後能懲艾。勉於為善者。亦宜書稱。前考稱職  
後或放肆改節者。亦書平常。以憑黜陟。○嘉靖  
二十七年。奏准在京各衙門給由官員。堂上官  
務要嚴加考覈。從公填注賢否的實。考語封送。

本部以憑覆考。案候考察年分查照黜陟。毋得市恩避怨含糊浮泛。以致是非顛倒。人心不服。仍行南京吏部轉行各衙門一體遵行。○隆慶二年議准。三六九年考滿官到部。仍照舊例。分別三等。不得槩考稱職。其平常與不稱職各官。或量行別處。或請

旨罷斥。

凡左右春坊司經局官考滿。洪武二十六年定。從本衙門將本官行過事蹟。并應有過犯備細開寫。送吏部考覈。不咨都察院。不用掌印官考語。○又定。

東宮官係近侍官員任滿黜陟取自

上裁

一凡科道官考滿洪武二十六年定監察御史從都御史考覈給事中從都給事中考覈都給事中從本衙門將行過事蹟并應有過犯備細開寫送本部考覈

六科不咨都察院都察院首領官與御史同

○又定

監察御史係耳目風紀之司任滿黜陟取自

上裁○正統二年奏准給事中考滿本科如無都給事中許掌科給事中考覈

凡尚寶司中書舍人考滿俱從本衙門牒呈通

政司關順天府呈部考覈不咨都察院○洪武  
二十六年定尚寶司中書舍人係近侍官員任  
滿黜陟取自

上裁○成化四年奏准中書舍人九年考滿稱職係  
進士舉人出身者陞員外郎監生出身陞主事  
乞

恩報効出身陞寺副等官○嘉靖三十二年議准中  
書舍人及

文華武英兩殿辦事中書舍人係官恩生儒士出  
身九年考滿陞寺副帶俸辦事○四十二年議

准中書舍人係

內閣廢官出身者九年考滿陞禮部各司主事照舊帶俸辦事○四十四年議准中書舍人係監生儒士出身九年考滿陞光祿寺署正帶俸辦事○萬曆元年題准。

兩殿中書官陞至正五品而止再有年勞止許加陞服俸

凡國子監官九年考滿宣德五年令學行端慤者量加翰林史職仍理教事正德中議准加俸凡欽天監太醫院屬官鴻臚寺通事官考滿俱

從禮部考覈咨送吏部○洪武四年奏准欽天  
監職司天文不准考滿後俱照例考滿○二十  
六年定太醫院欽天監官不係常選任滿黜陟  
取自

上裁○成化十四年令譯字通事序班等官九年考  
滿無相應員缺者陞授別衙門職事帶俸仍于  
本衙門辦事○嘉靖二十一年題准兩京欽天  
監太常寺太醫院屬官及譯字通事等官九年  
考滿有應陞之缺者照例陞職無應陞之缺而  
原缺見在者陞俸二級仍以舊職辦事原缺不



補。若係額外冗員并無見缺可陞。而原缺又已補者。照例搭選。不許牽合比例。添注帶俸。若譯字通事例難改選者。候挨次照缺陞補。○二十年題准。太醫院屬官。二六九年考滿。先送禮部填注考語。轉咨吏部。違越者。禮部參究。欽天監鴻臚寺通事官。俱照此行。○後又題准。吏目九年考滿。應陞御醫者。行禮部查回。應否陞補。方與題請。其原係署職者。九年考滿。止題實授。凡行人司官考滿。洪武二十六年定。行人以一年為滿。從本司正官考覈。分豁稱職。不稱職。呈

送禮部轉送本部覆考。稱職者予從九品內陞用。不稱職者予未入流品官內叙用。有過罰差一年。其正官從本衙門將行過事蹟并應有過犯備細開寫送本部考覈。○近例行人仍以三年為滿。從本司正官考覈呈送禮部轉送吏部咨都察院行河南道考覈牒回覆考。司副與正官同止本部考覈。不咨都察院。其行入一年考覈罰差例俱不行

凡京府治中通判推官考滿。洪武二十六年定應天府五品以下官從都御史考覈。○近例俱

從本府正官考覈呈部咨都察院堂上官考覈  
咨回覈考

凡公差官員考滿如管理各邊糧草屯種并河  
道驍廠及漕運理刑南直隸提學御史等官不  
得赴京具呈該衙門將行過事蹟并考語咨部  
應行河南道者候牒回覆考具題就彼復職管  
事其巡按審錄并各鈔關洪關等差俱候事完  
赴部備考○嘉靖四十五年議准南直隸印馬  
屯田御史雲南貴州廣東廣西福建四川巡按  
御史不拘三六年若滿期已過差事未完不得

赴京。及南北各差未完而考滿及期遇有陞遷  
事故者俱許具由呈部。在京者聽都察院考覈。  
在南京者聽南京部院考覈。移咨吏部覆考具  
題。應得

恩典。一體請給。其餘各差御史仍照舊例事完回京  
補考。○隆慶五年題准雲貴兩廣福建四川審  
錄郎中等官許就差考滿具由申部。其餘省分  
審錄官仍照例事完回京補考。○又題准公差  
官員考滿到部正限內准作實俸。若違限日久  
應送問者照例送問。其未及送問者正限之外

俱作虛曠。在差陞任者必到任之日方准實俸。如有假捏月日朦朧考滿者俱聽吏部參究罷職不敘。○萬曆五年令各邊管糧郎中三年滿日回部考察無過方許復職。○八年題准徐淮臨德天津各管倉官差內如遇三年考滿照各邊管糧官例將行過事蹟具呈該部咨送吏部類考。行令就彼復職。

凡兵馬司官考滿弘治三年題准先赴兵部考覈咨送吏部行河南道考覈牒回覆考。

凡京衛首領官考滿係上直衛所徑送屬五府

由該府起送赴部考覈

凡京縣管馬官考滿咨兵部轉行太僕寺查馬數。回日發落。

凡兩京所正所副所承天使副使司獄雜職等官考滿例不考覈。查俸明白。引奏復職。至九年考滿陞一級。

凡

內府各衙門工匠出身官員九年考滿。成化十四年奏准。俸職俱不陞。○弘治十六年。令匠藝官三年六年俱免赴吏部考滿。年老者工部徑自

施行。待其九年。方許給由一次。吏部驗有衰老不能供事者。著令應替之人。替役。年貌未衰者。照舊復職。

凡兩京神樂觀道錄司僧錄司官例。不考覈。九年考滿。具奏復職。照舊供事。

凡各帶俸官考滿。成化十六年題准。本衙門查有相應員缺。照該陞品級陞補。如無亦陞別衙門相應職銜。仍帶俸管事。

凡京官三年六年考滿。俱不停俸在任給由。

命下之日。為始連閏。但足三十六箇月。或三十七箇

月俱准一考。多歷少歷俱參問滿後三月無故  
不給由者參問。公差准理。

凡京官推選改授品級相等而支原官俸給者。  
考滿俱准通理。○嘉靖四十年議准翰林院講  
讀學士春坊諭德品級相同得准通轉俸歷考  
滿

凡考滿京官候審引間如陞兩京別官品級不  
同及陞遷外任者俱不與引奏止類付三司知  
會如原係署員外郎主事陞署郎中事主事者  
仍照舊引奏如先係署職得陞實授者不准



凡在京給由官員不拘陞俸住俸罰俸俱以見任職事所歷月日准作實歷

凡在京致仕閒住為民起用復任官舊例以後任歷俸日為始另歷三年給由正德六年令前後歷俸俱准通理

凡京官原係考滿陞俸者即同見任照俸扣滿其餘不准病痊支俸者只算實俸其患病住俸月日不准

凡京官年七十以上不論三六九年考滿俱不考覈行令致仕係堂上官亦不引奏特具本奏

請取自

上裁。惟欽天監例不致仕。仍引奏復職。

凡南京堂官考滿。永樂五年奏准。考滿日停俸。赴京給由。○嘉靖四十五年題准。今後南京各堂上官。雖遇考滿之期。必須本衙門見有堂官在任。方許給文赴京。如無堂官。各先具由移咨本部。知會候有官接管。然後起行。

凡南京各衙門屬官考滿。成化二十一年題准。俱南京吏部都察院考覈。停俸赴京給由。吏部類引復職。給憑還任。○二十二年奏准。南京各

衙門屬官首領官三年九年考滿照例赴京聽引。其六年考滿從南京吏部考覈具由類奏復職。免其赴京。其赴京考滿官員以給文日為始。除水程四十日外。扣違四箇月之上。參問雖有事故亦不准理。○嘉靖三十四年題准南京官考滿給文。將及三年未到部者吏部查參冠帶閒住。○萬曆七年題准南京官三九年考滿官員行至中途或丁憂患病回籍服滿病痊起文到部者候復除之日准補給由。○十二年題准南京官公差到京復

命已准復職計其回任半年之內遇應考滿者比照朝覲事例免其赴京從南京吏部都察院考覈咨部題覆

在外司府州縣官

王府官附

凡布政按察二司官考滿洪武二十六年定各處布政司按察司首領官屬官從本衙門正官考覈按察司首領官從監察御史考覈布政司四品以上按察司五品以上俱係正官佐貳官三年考滿給由進牌別無考覈衙門從都察院考覈本部覆考具奏黜陟取自

上裁○弘治間定布政司堂上官仍咨送都察院考覈按察司堂上官徑赴都察院考覈俱吏部覆考首領等官從河南道考覈功司覆考

凡邊方兵備副使僉事考滿嘉靖四十五年題准吏部轉行兵部查其操練修築屯種果有成效陽備調遣果無疎失者陞二級照舊供職平常者照常遷敘

凡管屯副使僉事考滿天順四年奏准將任內該管屯田數目移文該部查理如果完結考作稱職不完考平常

凡行太僕苑馬二寺卿丞考滿別無考覈衙門永樂三年令行太僕寺從都察院考覈吏部覆考○八年奏准北京遼東陝西甘肅等處苑馬寺卿丞等官依行太僕寺官例考覈主簿從本寺考仍送都察院河南道考覈吏部覆考其屬官監正監副錄事止於各寺考園長從本監本寺官考覈俱吏部覆考仍行兵部稽其所養馬數陞降其九年考滿者先以缺申部候代官至方許給由○弘治十五年令考察行太僕寺苑馬寺官不必會同布按二司各寺官果有才行

超卓者一體推舉陞用

凡鹽運司官考滿洪武二十六年定鹽運司首領官屬官從本衙門正官考覈鹽課提舉司正官至首領官任滿俱送本處布政司正官考覈仍送本處按察司覆考鹽運司五品以上正佐官別無考覈衙門從都察院考覈吏部覆考○永樂八年奏准鹽運司判官依本司堂上官例考覈○近例兩淮長蘆徑具由赴部咨送都察院考覈吏部覆考其山東兩浙福建河東陝西運司并各處市舶鹽課提舉司俱由布按二司

考覈中部覆考不送都察院仍各行戶部稽查  
錢糧明白至日發落

凡府州縣官考滿府正官從布按二司考覈府  
州佐貳首領官及所屬州縣大小官衛所首領  
官從府州正官考覈縣佐貳首領官及屬官從  
縣正官考覈俱經布按二司考覈功司覆考○  
洪武元年令各處府州縣官以任內戶口增由  
野闢為上所行事蹟從監察御史按察司考覈  
明白開坐實蹟申聞以憑黜陟○二十六年定  
在外有司府州縣官三年考滿先行呈部移付



選部作缺銓注。司勲開黃仍令給由。其見任官將本官任內行過事蹟保勘覆實明白出給紙牌。攢造事蹟功業文冊紀功文簿稱臣僉名交付本官親齎給由。如縣官給由到州。州官當面察其言行辦事勤惰從實考覈稱職平常不稱職詞語。州官給由到府。府官給由到布政司考覈如之。以上俱從按察司官覆考。仍將考覈覆考詞語呈部考覈。平常稱職者於對品內別用。不稱職正官佐貳官黜降首領官充吏。○三十五年。令有司官三年考滿到部考覈稱職平常

者俱復任。九年通考。不稱職者。依例降用。○宣德五年奏准。天下官員三六年考滿者。所欠稅釋立限追徵。九年考滿。任內錢糧完足。方許給由。○正統三年奏准。有司親民官員。給由牌內。須開寫任前并任內逃民數目。及招撫復業多少。以憑黜陟。○弘治二年奏准。有司官考覈詞語。雖不開稱職平常不稱職字樣。初考二考。就與定稱。否引奏復職。三考仍候行查定奪。全無考覈詞語者。行查差錯。官吏俱照例叅問。○十六年奏准。凡天下官員三六年考滿。務要司考

府府考州州考縣但有錢糧未完者不許給由  
其給由到部不係九年者不許送戶部考覈○  
萬曆元年奏准今後外官考滿到部行戶部查  
勘錢糧完過八分以上考方准考滿不及分數  
者不准

凡直隸有司官考滿洪武間定州縣官考覈如  
例其府官給由送監察御史考覈本部覆考類  
奏○弘治間定南北直隸府州正佐官及衛首  
領官無上司所轄者考滿到部俱送河南道考  
覈勝回功司覆考係清軍者兵部稽考清解軍

數管馬者兵部行太僕寺稽考馬數管糧及帶辦商稅者戶部稽考有無拖欠俱待移咨到日方准引奏

凡邊海管糧官考滿正統十年奏准沿海收糧官三年六年考滿俱留辦事候九年通考赴部  
○嘉靖三年奏准管理邊糧通判考滿撫按定擬每員應該收糧石數守支盡數給由到部考覈稱職照各邊收糧判官照歷事例改選腹裏以均苦樂若別無罪過而經手錢糧石數有未完足者候六年考滿量為更調

凡遠方官考滿。洪武十六年奏准。兩廣所屬有司官地有瘡瘍者。俱以三年陞調。雖係兩廣而無瘡瘍者。仍以九年為滿。福建汀漳二府。湖廣郴州。江西龍南。安遠二縣地亦瘡瘍。一體三年陞調。○二十六年定雲南有司官員任滿給由一體考覈。不稱職者。黜降。緣係邊方。具奏復任。九年通考。○弘治三年奏准。雲南貴州地方官除方面知府外。同知以下。并軍職衙門首領官。三年六年考滿。許赴本布政司給由。○五年奏准。雲南所屬官。三年六年不行赴本布政司給

由。不繳牌冊到部者亦照例送問。

凡在外大小官員考滿。正統五年。令除教職陰陽醫學外。俱照洪武年間定制。即便離職。依限給由。赴京考覈。其牌冊內滿後有開支俸管事者。不准。○弘治二年。令外官歷任六年止。具三年事蹟給由者。免其叅問。准作三年考滿。亦不補造六年牌冊。候九年考滿。以六年事蹟再造牌冊給由。○五年奏准。凡歷任三年六年。雖有專責。占差。必須一次給由。違者送問。若有例前納米。曾經繳報牌冊到部者。不在此限。○十三

年。今在外大小文職若九年已滿。託故在任。久  
住不行赴部。及不申缺者。叅問放回閒住。○又  
例。凡在外起送考滿官。俱要合干上司查勘明  
白。一一具結。如無一處印信保結者。行查。○凡  
牌冊內。不填小日。不僉名。不稱臣。該吏背書不  
畫字。勲司駁送功司紀錄。年終類奏。○凡公文  
批牌內。不開除授到任考滿年月日期。增減十  
歲。以子戶口無新增。俸月多歷少歷。不開前任  
事蹟隱匿過名。及紙牌不填字號。漏用印信。批  
咨申結內。洗改為事。丁憂患病。痊可年月緊關。

字樣者俱參問。少歷者復除補轉。若增減不及  
十歲。差錯藉貫出身除授復任年月日。不署職  
背書該吏名缺不開報。及丁憂起復復除共轉  
九年。不開前後備細俸月者。俱准改正。○嘉靖  
二十五年奏准。今後在外司府方面以上給由  
官員除邊方軍馬重大災傷緊急者。許撫按合  
詞奏留。就彼復職。其餘專職常員。地方細故。不  
許一槩任情輕瀆。即有事出一時委難離任者。  
止令暫留管事。事寧之日。仍要給由赴部。○四  
十二年題准。在外三六年考滿官員除方面府



佐。照舊赴京。有事地方。照舊保留外。其府州縣正官。給由。免其赴京聽撫。按考覈具奏。牌冊差人齎繳。州縣佐貳司府衛首領及教官雜職等官。三六年考滿。俱赴各該上司。從公考注。稱職平常。不稱職三等。轉詳撫按。年終類題冊報部院覆考。

凡外官歷俸。弘治三年奏准。給由官員歷俸一百八箇月。或一百十箇月。俱准九年考滿。着多歷少歷者。俱參問。少歷一月以上者。問非補任。未及一月者。若任內錢糧等項完結。亦照例問。

罪免其補任。如有未完事件。須回任完結。方許給由。○萬曆十年議准。在外降俸官員。除錢糧不完。積穀不及數。被盜失囚者。待追完捕獲。撫按官具奏開復。內有災癘難完。及擒獲別賊。亦聽撫按官照例題請。其餘他事。註誤各令歷過三年滿日。申請給由。撫按考覈平常。不稱即行議處。稱職准贖。先與奏復原俸。然後給文考滿。其三年滿後降俸者。撫按查果稱職。酌量具奏。若還官事發。著於陞任內扣降者。雖係糧穀不完。被盜失囚等項。既經離任。亦照註誤之例。○

又題准在外罰俸官員考滿及期必扣除月日另歷補足。撫按官方與起送或保留其罰俸月日。以題奉

欽依之日為始。不得以文書未到為辭。失囚失盜糧穀不及分數者未奉處分不得遽行起文

凡給由限期。弘治間定。南直隸并浙江等布政司俱一年零二箇月。北直隸八箇月。○正德四年奏准以給批日為始。係任滿者違限一年之上。送問。二年之上。發回原籍致仕。係三年六年給由者。四箇月之上。送問。一年之上。發回原籍

致仕○嘉靖二十一年奏准三年六年考滿不依期限到任者照朝覲例過限一月之上問罪申報二月之上送部別用三月之上罷職不叙監司容隱不舉同罪○萬曆四年題准在外有司官滿後不計閏扣違年半之上方纔校文到部者不准考滿係三年者候六年再考六年者候九年通考○十二年題准外官滿後務於半年之內給文除各該水程外定限十月到部若水程之外滿後不計閏無故延至一年者送問在外者提問干礙來提者來問若違至年半者

雖有事故。一併查宋處治。如有規避情由。及無故遲違年半者。俱從重奏議處。

凡調任改除官考滿。永樂八年。令外官改除別任。品級相同者。准通理。若推官改知縣。雖品級相同。例不准理。○弘治二年題准。外官復除改除前後兩任。以十八箇月為半。如前任月日少許於後任月日通理。多則再歷三年。不得以後任轉滿。○又例。京官調外任。不論大小。雖品級相同。俱不准通理。○隆慶五年題准。以後外官考滿。不論前後任年月多寡。俱得通理。仍兼查

兩處賢否以行考覈

凡外官考滿陞遷洪武三年奏准府同知一考無過者陞知府知縣二考無過者陞知州縣丞一考無過者陞知縣○弘治二年奏准有司官九年考滿不分前任後任但事繁歷俸日多者陞二級事簡歷俸日多者陞一級○又題准該陞正七品併從八品官員本等員缺照舊選用如無本等員缺有聽選年冬七品告願從七品并從八品告願正九品者查有相應職事挨次選用仍支該陞品俸○九年奏准凡天下司府

佐貳官及州縣正佐并衛所首領五品以下官員九年考滿到部考覈繁稱無過陞二級有過并簡而稱職無過陞一級若繁簡平常有徒杖罪或初次不給由者俱照例遞降定擬該陞該降品級挨次選用若守候一年之上有願遞減選用者以照從四品告願正五品事例除授職事仍給與該陞服色俸給

凡朝覲進表官考滿宣德五年令來朝官員回任三六年滿期已過者許先赴部告明令所司造冊送合干上司考覈差人奏繳○嘉靖十六

年奏准回任將及考滿者亦照宣德間例○十七年奏准考察存留官員順齋考滿文冊者免其考覈引奏復職○二十二年定朝覲官告乞齋繳者查其考滿月日如在七月以內方准其月日尚遠及九年考滿者俱不准○四十五年奏准進表官考滿日期不遠者照朝覲例告明齋繳

凡外官考滿患病丁憂洪武二十六年定考滿官吏患病一年以上雖有文憑不准不及二年患帖無告官痊可月日亦不准○又定中途聞



喪不將牌冊赴所在官司告繳及起復之日方告繳者送問。若中途被水火盜賊失落公文者行查。○萬曆七年題准。有司三六年已滿。照例齎繳文冊。聽撫按保留間。丁憂回籍者。俟復除之日。准補給由。

凡外官陞任考滿。萬曆七年題准。方面有司三年已滿。給文冊。適遇陞任。本部查其陞遷月日。果在任滿之後。不論已未保留。但公文開稱考覈稱職者。一體准理。如陞遷。

命下。而歷俸未滿。即少一日。不許稱准。

凡考滿官吏在途病故。宣德五年奏准。所在官司據其隨行親人具告。即便差人相視明白。給與堪信文憑。遺下原齎牌冊批文。就與轉繳。凡各

王府官及護衛首領官考滿。洪武三年。令俱復職。不考覈。

### 教官

凡教官考覈。洪武二十六年。定各處府州縣學訓導與教官一體。歷俸九年考滿。給由其訓導給由到部。出題考試。將所試文字送翰林院批

考通經者於縣學教諭內敘用。若不通經者本處復充訓導。自來不通經者量才別用。教官考覈稱職陞一等。平常者本等用。不稱職者黜降。不通經者別用。○又奏准以九年之內科舉取中生員名數為則。定擬陞降。縣學額設生員二十名。教諭九年之內科舉取中生員三名。又考通經者為稱職。陞用。若取中二名。又考通經者為平常。本等用。若取中不及二名。又考不通經者為不稱職。降黜別用。州學額設生員三十名。學正九年之內科舉取中生員六名。又考通經

者為稱職。陞用。若取中三名。又考通經者為平常。本等用。若取中不及三名。又考不通經者為不稱職。降黜別用。府學額設生員四十名。教授九年之內。科舉取中生員九名。又考通經者為稱職。陞用。若取中四名。又考通經者為平常。本等用。若取中不及四名。又考不通經者為不稱職。降黜別用。府州縣學訓導分教生員一十名。九年之內。科舉取中生員三名。又考通經者陞教諭。若取中二名。或一名。又考通經。仍充訓導。若科舉全無取中。又考不通經。降黜別用。○又

奏准教諭科舉及數考不通經。有司內用科舉不及數。通經降訓導○三十五年。令教授考通經。任內止有舉人三名者。降學正○永樂元年。定舉人署教諭事者。任內有科舉中式一名。又有歲貢中式一名。署訓導事者。有科舉中式一名。或有歲貢中式一名。俱與實授○六年。令教官考滿吏部同六科都給事中。選其有才識者。留六科理事。一年後。從本科都給事中。考其高下用之○宣德五年。重定舉人名數。教授五名為稱職。三名為平常。不及三名為不稱。學正三

名為稱職。二名為平常。不及二名為不稱。教諭  
二名為稱職。一名為平常。訓導一名為稱職。不  
及者皆為不稱。稱職者陞。平常者本等用。不稱  
者降。○正統九年奏准。教官九年任滿。無舉人  
者。試其學問果優。仍任教官。教授學正。教諭俱  
降訓導。訓導調邊遠。其考不中者。仍降雜職。○  
又奏准。考試考滿教官。初場考四書本經義各  
一篇。二場論策各一道。教授學正。教諭俱本部  
定中否。訓導送翰林院定中否。考不通經。係舉  
人出身者。教授改吏目。學正等官改典史。監生

儒士出身者教授改稅課司大使學正等官降  
河泊所官衛學并選貢衙門學正考不通經亦  
同前例冒報舉人者送問無府州縣委官保結  
者行查雲南各處教官從選貢衙門例亦不論  
舉人○弘治二年奏准九年考滿教官考通經  
府州縣舉人及數方陞衛學并選貢衙門雖無  
舉人亦陞若丁憂復除者論前後任多少若任  
府州縣學日多從府州縣學論任衛學并選貢  
衙門學日多從衛學并選貢衙門論○嘉靖四  
年題准府州縣學教官考不通經有舉人者仍

照原職選用

凡行都司儒學及外衛儒學教官考滿嘉靖四年題准除考通經有舉人及數照例陞用外無舉人考通經查無過者俱本等選用

雜職官入流倉官

收糧經歷等官附

凡內外雜職官考覈洪武九年令倉庫司局管錢穀官以歷俸屆歲為滿收受少者以數付交代官給由多者以半俸守支畢日給由雖經改除亦以九年通論○二十六年定內外雜職官三年給由無私過者未入流陞從九品從九品



陞正九品稅課司局及河泊所倉庫官先於戶部查理歲課軍器織染雜造等局官先於工部查理造作花銷明白送部類奏○正統三年奏在外河泊庫官鹽稅局鹽倉茶鹽批驗所等官三年六年考滿係北直隸者赴吏部考覈引奏復職係南京者赴南京吏部係布政司者赴各布政司查理明白就令復職各布政司仍將各官牌冊具本差人類繳候九年通考以憑查考多歷少歷違限錯悞俱送問九年無過陞一級有過本等用○五年奏准司府州縣衛所考

滿丁憂起復倉庫稅課司河泊所官將任內收過課程等項備開納獲通關字號及倉庫錢糧支銷明白。餘剩物件交與見任官攢收掌。取具各該府州縣衛所官吏保結轉達布政司都司。就令考滿官員親齋赴京。丁憂回籍者將首尾交盤明白。亦具緣由申報本部。候各官起復。以憑查考。○弘治間定。凡倉庫司局等官俱行戶部查勘經收錢糧。河泊所官行戶工二部查勘。魚課織染局官行工部查勘。段疋鹽課稅課司局官行戶部查勘。鹽課商稅在南京者俱由南

京查勘明白起送赴部○十四年令儒學巡檢  
倉庫驛遞等官考滿到部功蹟不足或有過名  
自願告退者照有司不稱例各仍原職致仕  
凡倉官洪武十四年令各處倉官周歲考滿守  
支俸給支三分之一守支畢日未入流陞從九  
品已入流陞正九品○二十六年定倉官收糧  
不及千石者本等用虧折而陪納足備者照依  
品級降用近例陪完者免罰其有私筭者本等用但犯  
贓私并私罪曾經杖斷者未入流降邊遠從九  
品降未入流用○二十八年奏准內外倉官歷

過全俸雖未周歲所收糧數已滿千石遇父母喪守制俟服滿後照起復官員本等改用○宣德元年奏准。

長安四門倉副使不係經收糧斛該本等搭選南

京者具奏入選

今亦收糧照常付選

○正統元年奏准山

東都司所屬沿海倉官考滿守支盡絕給由布

政司查理明白仍送原衙門照例給由○弘治

間定凡倉官有特附餘耗米交盤者送問駁回

守支○隆慶六年題准正糧放支盡絕若交盤

附餘耗米不及五十石者免究五十石至百石

者。歷付百石以上者送問。二百石以上者駁回。  
守支○萬曆元年題准京通二倉官攢守支盡  
絕。即日起送。如零數坐支不盡千石上下者盤  
併別處轉放。一體起送○六年題准腹裏倉官。  
照邊倉例。任滿起送。給由免其守支○七年題  
准從九品及雜職倉官。但經犯有徒杖。止降改  
雜職倉官。不選鹽場驛遞等官。

凡草場官。正統元年奏准在京居賢等坊草場  
大使副使收草十萬束以上者陞一級。不及數  
者本等用○弘治五年奏准大同宣府遼東甘

肅等處各草場官但以九年為期。或八年前後遇例差官經盤堆垛如法數目不少。准令起送。凡倉場官弘治間定收糧千石草十萬束以上無過陞一級。有笞杖罪本等用。徒罪降用。若收糧不及千石草不及十萬束者。歷俸周歲許交盤給由。其大同宣府倉場官守支盡絕。其盤收前官糧草該減俸如支盡絕給由。到任半年無糧收受者起送赴部。行戶部查勘明白付文選司別用。若初到之時雖曾盤收。不係經收者亦起送。其正糧守支盡絕即當減俸。若守候二年

之上放支不盡絕者仍聽全支本等俸給不及二年不許。或守支間奉上司委署別衙門印信亦不許遷延過違年限。丁憂復除或改除河泊所官千戶所吏目俸月不准通理。違者皆送問。○嘉靖三年奏准宣府東路懷來等城堡倉場官聽各該撫按官會議每官一員定與應該收放料草數目守支盡絕方許給由吏部覈實如果稱職照各邊收糧判官經歷事例改選○隆慶六年奏准陝西延安固四鎮各城堡倉場官攢一年已滿許將經手錢糧呈詳撫按委官

查盤明白交付接管官攢即與起送不必守支盡絕○萬曆元年題准各邊倉場俱照陝西事例○十三年題准倉場官收到糧草任內隨時支放周歲任滿交與新官接管本官刻期起送若糧草數多如京通臨德等倉以數千萬計盤量不便者方令留任守支支剩糧千石草萬束亦照京倉事例交盤起送若遇有查盤閱視及有監督部臣處所亦照臨德二倉事例隨交代盤量之後起送給由毋令過於三年亦不必以千石萬束為拘



凡

內府庫官。洪武二十八年奏准。一年為滿。就將原

收物件盤與新官接管。給由對品改用。節慎庫官三年

考滿○永樂八年奏准。順天府廣備庫大使副使

考滿照

### 內府庫官例

凡易州等處山廠管柴官員。正德十四年奏准。

凡遇三年六年考滿。不必經合干上司止留管。

廠侍郎考覈起送。○嘉靖三年奏准。山廠管柴

官果有勉盡職務。操持無玷。三年內領運柴炭。

完足者准照各邊管糧官事例改選

凡鐵冶局官考滿行工部查經收炭料等項回文到日發落

凡柴炭司大使副使考滿工部咨到查無過對品用

凡內外收糧經歷州判官吏目弘治間定俱以三年為滿守支盡絕給由到部送河南道考覈本司覆考具奏入選南京所屬具由南京河南道吏部考覈其有丁憂起復未經南京衙門考覈者行查各衛倉經歷每衛止留一員收放糧

斛其餘三年一替起送赴部俱以原職改除補  
轉九年照依繁簡事例考覈黜陟任內收糧十  
萬石以上無過考稱或平常俱陞一級有過本  
等用若收糧不及十萬石考稱或平常俱本等  
用其守支年深與守支間丁憂起復例同

凡在京各衛倉經歷三年考滿宣德四年奏准  
給半俸守支若糧不及千石照依倉官例交盤  
給由調用仍候九年黜陟

凡巡檢考滿洪武初定無私過者陞正九品犯  
私筭者本等用杖罪降雜職○二十五年奏定

巡檢考滿。捕獲軍囚盜賊等項二百名之上。無私杖者。陞一級。有私杖對品用。一百名之上。無私杖者。對品用。有私杖降雜職。三十名之上。無私杖者。降雜職。有私杖者。降邊遠雜職。不滿三十名者。發邊遠充軍。若有強賊及逃軍聚衆劫掠。能擒獲以除民害者。二十名之上。無私杖者。陞一級。有私杖者。對品用。一十名之上。無私杖者。對品用。有私杖者。降雜職。九名之下。無私杖者。降雜職。有私杖者。降邊遠雜職。若擒強賊逃軍六十名之上。或止二十名。而又能獲軍囚二

百名之上及擒偽造寶鈔及偽印者具奏陞用  
○永樂元年令巡檢考滿應陞自陳不堪別用  
乞仍舊職者聽○成化間定巡檢考滿例獲強  
盜三名至九名軍囚不及一百名者無過降雜  
職有過降邊遠雜職強盜十名之上軍囚百名  
之上者無過對品用有笞杖過降雜職徒罪降  
邊遠雜職軍囚二百名之上強盜二十名之上  
有招或不及二十名或無強盜無過陞一級有  
笞杖過對品用徒罪降雜職若獲成羣強盜二  
十名之上或六十名之上又有招由軍囚二百

名之上。有事由。或不及。無過陞一級。有笞杖過對品用。徒罪降雜職。若獲偽印一顆。或二顆。有覆造招由。軍囚不論有無。無過陞一級。有笞杖過對品用。徒罪降雜職。○弘治二年題准。巡檢三年考滿。以新官更替。日扣筭例限。府州縣掌印正官。將任內捉獲軍囚等項。從實查勘具結起送。其沿海巡檢。亦要畫圖貼說。以憑查考。若起送無府縣巡司保結。軍囚公文止開起數。不開花名。或止開花名。無籍貫并所犯事由。強竊盜抄招。無縣印鈐縫。偽印不開。是何衙門印信。

及令犯人當官覆造相同。丁憂起復無本司關  
文及洗改更替月日。強竊盜軍囚總數者送問。  
凡沿海及土官巡檢。永樂十一年令俱不論軍  
囚。無過本等用。有過降用。蘆溝橋張家灣白溝  
河通州北關灤縣楊村。河西務軍家橋巨河小  
直沽河陽與濟緊要地方軍囚強盜俱二名折  
一名。○正統六年奏准土官巡檢三年六年攢  
造牌冊。赴本布政司給由復職。九年通考赴部  
黜陟。

凡驛遞開壩官。舊制俱三年赴部給由。惟雲南

驛丞各以三年一次赴布政司考覈。九年通考。然後赴部。○宣德四年奏准貴州所屬驛丞照雲南事例考覈。○正統元年奏准廣東所屬雜職衙門。三年六年考滿。照廣西雲南例。驛丞遞運所大使赴布政司考覈。河泊稅課等官仍舊。○又奏准各處水馬驛丞及遞運所大使。九年將滿。吏部預選官交代。住俸管事。新官至日。方許給由。○三年奏准驛遞開壩官。直隸府州縣所轄三年赴部。其有布政司所轄三年赴布政司。并按察司考察。稱職。平常復職。仍將各官牌



四年終類進。九年赴部通考。○五年奏准南北直隸驛遞開壩司獄等官。三年赴巡按御史考覈。定與稱職。不稱職考語連牌冊發有司收候。年終類繳。九年赴部通考。○景泰元年奏准南北直隸驛遞開壩司獄等官。三年六年考滿。南北直隸者赴南京吏部。北直隸者赴吏部。凡驛丞九年考滿。牌冊內事蹟不開報應付過。使客備細花名起數者送問。

凡驛遞等官。無過陞一級。有過本等用。

考覈通例

凡內外官考覈洪武二十六年定內外入流并雜職應考官員任滿給由赴京本部從實考校才能優劣依例黜陟。果有殊功異能超邁等倫者取自

上裁○又定繁簡則例在外府以田糧十五萬石以上。州七萬石以上。縣三萬石以上或親臨

王府都司布政司按察司并有軍馬守禦路當驛道邊方衝要供給去處俱為事繁。府州縣田糧在十五萬七萬三萬石之下僻靜去處俱為事簡。在京衙門俱從繁例○繁而稱職無過陞二

等。有私咎公過陞一等。有紀錄徒流罪。一次本  
等用。二次降一等。三次降二等。四次降三等。五  
次以上。雜職內用。繁而平常無過陞一等。有私  
咎公過本等用。有紀錄徒流罪。一次降一等。二  
次降二等。三次降三等。四次以上。雜職內用。簡  
而稱職與繁而平常同。簡而平常無過本等用。  
有私咎公過降一等。有紀錄徒流罪。一次降二  
等。二次雜職內用。三次以上。黜降。考覈不稱職。  
初考繁處降二等。簡處降三等。若有紀錄徒流  
罪者。俱於雜職內用。○又定九年之內。三考稱

職。一考平常。從稱職。二考稱職。一考不稱職。或  
二考平常。一考稱職。或稱職。平常。不稱職。各一  
考者。俱從平常。二考平常。一考不稱職。從不稱  
職。○永樂四年。奏准各都司衛所布政司按察  
司。行太僕寺鹽運司鹽課提舉司煎鹽提舉司  
市舶提舉司茶馬司考覈。俱從繁例。宣慰宣撫  
安撫。招討長官司。俱係土官衙門。從簡例。○八  
年。令官員九年考滿。初考稱職。次考未經考覈  
三考稱職。初考次考不給由。三考稱職者。俱從  
稱職。初考不給由。次考稱職。二考平常者。初考

平常次考不給由三考稱職者俱從平常初考  
不給由次考平常三考不稱職者從不稱職○  
弘治間定凡考滿官患病不滿三月及非緣事  
住俸月日不作實歷者叅問增減十歲以上考  
滿後非因公差占廩俸半年以上及不報前  
任事蹟并隱匿過名者俱送問

考覈三

吏員

承差知印同

內外吏員給由事體大畧與職官同承差知印  
附後

凡吏員一考滿。洪武二十六年定在京大小衙門。及在外布政司。并直隸府州縣吏典。各以三年考滿給由。其倉攢典。以周歲為滿。稅課司庫局攢典。考滿之日。隨即交割明白。給由。府州縣倉攢典。將經收糧斛支銷盡絕。方許給由。府州縣吏典。考滿當即給由。如布政司府州縣過違一年。直隸并在京過違半年。給由到部。俱送法司取問。如不過違者。隨付司封。照依資格撥用。○又奏准。各衙門吏三年役滿。於本衙門見缺。令史書吏內陞用。再歷三年。給由赴京。如有餘

吏送赴吏部。不許一槩縣陞於州。州陞於府。府陞於布政司等衙門。及

王府長史司。託故不給由者治罪。○宣德三年奏准。吏役滿擇其年五十以下。堪用者存留。五十以上。不堪用者俱罷為民。○弘治間定。凡在外一考吏滿無缺。起送赴部。查無違礙。付驗封司撥補兩考。

凡吏員二考滿。洪武十七年議准。考滿吏員試中第一第二等者。於在京有出身衙門內用。第三等者。於在京未有出身衙門內用。仍以等第

姓名。出榜曉諭遇缺以次撥用。○景泰二年奏准在外吏兩考後滿止以實撥辦事月日為准。丁憂月日亦准實歷數內有省祭送幼子還鄉為事虛曠月日仍撥補轉。

凡吏員三考滿宣德四年令吏部通引。

內府會同六部都察院翰林院堂上官出題南北類試錦衣衛堂上官監察御史六科給事中監試考其文義粗曉行移的當書札不謬三事俱可取者為一等照本等資格用。二事可取者為二等雜職內用。三事俱不可取者發回為民當



差○又題准。三考役滿吏考其法律通者為一等。依資格出身。其次為二等。雜職出身。不通者為三等。給與冠帶。放回閒住。○成化七年。令三考役滿吏。與從吏部陸續考試。不必會官。仍照三等例行。○弘治二年。奏准。三考吏類試有曳白。不通文理者。發回為民。當差不得槩給冠帶。○嘉靖二十三年。題准。三考援例冠帶吏。與止照援例資格冠帶。不許再行告考。○萬曆九年。議准。三考役滿吏。與有老疾不堪應試者。請給冠帶。回籍榮身。○近例。吏與考中一等者。仍查

役內有無過犯無過。照資格出身。若犯公私徒杖罪。及私笞賊等不盡者。俱降級。若犯公私笞罪。減盡無科者。俱免降級。查審明白。同二等吏通類引奏。冠帶入選。

凡給由例限。弘治間定。南直隸并各布政司。俱十四箇月。北直隸八箇月。違者送問。

凡給由違限。洪武三十一年奏准。吏員考滿。不給由。丁憂不起復。及侍親等項。託故在閒。已經官府問斷。仍充吏役者。重歷三考。○永樂十一年。奏准。在外吏考滿。照官員給由程限赴部。若

託故遷延者問罪。妻子同發北京充軍種田。○二十年令吏典不給由丁憂不起復得代不赴京赴京不著役者悉發保安衛充軍。○正統元年奏准在外吏役六年給由違限者問罪解京重歷給假省親祭祖送幼子還鄉等項違限送問者俱不重歷。○十二年奏准考滿吏歇役在家過違例限不行給由或丁憂服滿起復違限或侍親親終起復違限或丁憂起服不補原缺參補別衙門或託故在閒年久復充吏役或一考多歷一箇月或給由起送違限雖告有堪信

文憑達延二年之上。或給由起復到部。將役內年月日期增減。及多增五歲以上。有規避者。或丁憂少守制多守制一箇月。或越關在逃。行提解京者。俱察問重歷。或歷役一考。或歷役未滿公差事完。已滿一考。或歷役一考滿。為言回還。或丁憂服滿起復。及截替裁革吏。本衙門有缺。俱許三箇月以裏察補。無缺起送合干府州縣查缺。四箇月以裏察補。又無缺起送本布政司查缺。五箇月以裏察補。其都司衛所吏典無缺起送該管有司查缺。依例轉撥兩考給由。但違

一年之上未補者未問重歷。或為事歇役。或考滿為事歇役。俱以問結之日為始。應還役者。仍補原役。轉歷兩考已滿為事還役者。俱照限給由。違者未問重歷。或為事做工公差等項。俱以問結事完上滿之日為始。若遷延一年之上。著役者未問重歷。其倉場攢典以守支盡絕之日為始。依例給由。違者未問重歷。○弘治間定。凡在外吏典。除役內丁憂外。若一考滿後不行給由。展轉捏故。在役管事。或歇役三年之上者。就彼問發。為民中間雖有事故。亦不准理。故違收

叅起送官吏叅問治罪。若兩考後滿接喪丁憂服滿遷延三年之上不行起服者亦發為民。其未及三年果有事故實蹟各該衙門保結起送吏部查照定奪。雖在三年之內起送過限到部者送問重歷。○近例吏典二考給由到部如違限二年半之上暫付行查。三年之內給文。三年之外到部者行查定奪。若起文雖在三年之內到部在四年之外并起文到部俱在三年之外者革役。如公文開有爲事耽延招冊明白行查定奪。如無事故俱革役。○又例三考滿後一年

之上到部收考行查。二年之。行查定奪。三年  
之。革役。

凡給由公文。正統二年奏准。俱令入遞申部。不  
許親齎作弊。○弘治間定。吏典給由赴部中途  
被水火盜賊。夫落原給公文。雖告有所在官司  
文憑。亦待行勘明白。方許付換。若將批咨申文  
手本內緊關年月字樣洗改有跡。或給批年遠  
遇革。不倒換新批者。俱送問。

凡給由查問。弘治間定。吏典給由查無本處造  
到吏用驗封司暫撥辦事。行勘無礙。辦事滿日。

照例實撥倉場攢典例同

凡告撥轉考近例吏典告撥在外衙門准作京考滿日給由赴部查其候缺三年之外方叅者收考行查六年之外者行查定奪九年之外者革役如公文明開守缺人多在官聽補者免查革若違十年之外雖有前項緣由仍行查定奪十五年以上者雖有事故亦不准理○又例凡在外補轉三考及二考吏役內曾犯笞杖罪名不抄原問衙門招由繳部者不准收考凡乞恩免考嘉靖三十年議准隨邊隨工書吏



敘功乞免考辦省祭者止免官辦仍要考試省祭○萬曆元年議准邊吏止免初考兵部吏雖初考不許槩免○七年令今後書吏再不許濫敘邊功希圖免考○九年令各衙門軍功工完等項再有敘及書辦人等者著該科叅奏吏典革役

凡倉場攢典守支弘治間定攢典守支八年不盡者委官交盤明白交與見任官攢守支給由其批內不開守支盡絕年月日期及違限者送問曾經收放糧草者查照守支年分多寡免其

辦事就撥當該全無收放者起送赴部駁回另歷

凡在外鹽運司及遇例納米等項吏典俱送戶部查理鹽課通關回報方許收考

凡戶兵二部書算九年考滿中一等者依資格出身二等者雜職出身三等者冠帶閒住

承差知印

凡承差知印考滿洪武二十六年奏准在外承差三年考滿役內無私過雜職內用有私過充吏役○正統元年奏准在外三司承差有缺於

民間丁糧相應殷實之家選其才貌可用者縣  
申州州申府府申布政司覆勘相同方許收  
有私過者充吏役保舉官員坐罪○弘治間定  
凡承差役滿到部本司審實付文選司分撥各  
衙門辦事知印役滿查明奏充年月日期收考  
奏請冠帶付文選司分撥辦事但犯笞罪以下  
俱發充吏考滿不給由丁憂不起復為事在逃  
遇赦者仍發重歷若役滿到部違限隱匿過名  
多歷少歷增減年歲及咨批內洗改緊關字樣  
者俱查問

任條例

高皇帝懲吏職之弗稱。親製責任條例一篇。頒行各  
司府州縣令刻而懸之。永為遵守。務使上下相  
司。以稽成效。今謹錄之于左。

洪武二十三年

勅方今所用布政司。府州縣按察司官。多係民間  
起取秀才人材。孝廉各人授職到任之後。畧不  
以到任須知為重。公事不謀。體統不行。終日聽  
信小人。浸潤謀取。賊私。酷害下民。以此仁義之  
心。淪落殺身之計。日生一旦。繫獄臨刑。神魂舍

皇至於哀告懇切奈何虐民在先當此之際雖  
欲自新不可得矣如此者往往相繼而犯上累  
朝廷下辱鄉閭悲來父母妻子孰曾有鑑其非而  
改過也哉所有責任條例列於後

一布政司治理親屬臨府歲月稽求所行事務  
察其勤惰辨其廉能網舉到任須知內事目。一  
一務必施行少有頑慢及貪污坐視恬忍害民  
者驗其實蹟奏聞提問設若用心提調催督宣  
布條章去惡安善儻耳目有所不及精神有所  
不至遺下貪官污吏及無籍頑民按察司方乃

是清

一府臨州治亦體布政司施行。耳目有所不及精神有所不至。遺下貪官污吏及無藉頑民。布政司方乃是清。

一州臨縣治亦體府治施行。耳目有所不及精神有所不至。遺下貪官污吏及無藉頑民。本府方乃是清。

一縣親臨里甲。務要明播條章。去惡安善。不致長奸損良。如此上下之分。定民知有所依。巨細事務訴有所歸。上不紊政於

朝廷下不銜寬於滿地此其治也歟。若耳目有所不及精神有所不至遺下無警頑惡之民本州方乃是清

一若布政司不能清府府不能清州州不能清縣縣不能去惡安善遺下不公不法按察司方乃是清

一按察司治理布政司府州縣務要盡除姦弊肅清一方耳目有所不及精神有所不至巡按御史方乃是清儻有通同貪官污吏以致民冤寧枉者之體究治

一此令一出諸司置立文簿將行過事蹟逐一  
開寫每季輪差吏典一名齎送本管上司查考。  
布政司考府府考州州考縣務從實效毋得誑  
惑繁文。因而生事科擾。每歲進課之時布政司  
將本司事蹟并府州縣各齎考過事蹟文簿赴  
京通考。敢有坐視不理有違責任者罪以重刑。  
嗚呼。今之布政司不挈所屬貪贓官吏又不申  
聞關葺不才。諸等不公不法亦不究問。府文到  
司並不審其為何。但知遞送而已。府亦以州文  
如此。州亦以縣文如此。自布政司至府州皆不



異郵亭耳所以不治爲此也

大明會典卷之十二